



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8 Yangia anidakangma : Tir Yimym tir\_yimym

tir yimym TAPAK 7



**Manny Pacquiao aser Ruslan Provodnikov na April ita asayatsü**

**Philippine VP Sara Duterte 2028 küm tir atema tokteptsü**



VOL. XXIII ISSUE NO. 127 (ADOK 127) DIMAPUR YANGTEPNÜ (THURSDAY) TSÜKLAI (FEBRUARY) 19, 2026 ₹ 5.00

## AHODs aser HoDs tajungba inyaksü ayongzük

**Dimapur, February 18, 2026 (TYO):** February 18, 2026 nü Administrative Head of Departments (AHODs) aser Head of Departments (HoDs) senden ka menogo.

Nagaland Civil Secretariat, Conference Hall, Kohima nung 2026 atema mezüngbuba senden ya Chief Secretary, Sentiyanger Imchen, IAS menden ser amen.

"Administrative Heads of Departments (AHODs) aser Heads of Departments (HODs) aikati 'leave of absence' melii station toktsür aoba atema tebilemstü abener. Ketdangsur ajaki inyakyim sülen anidaksüla aser AHODs ajaki Chief Secretary dang sodi meshir ang station toktsür aotsüla. Maneni, HoDs-ia pei pei Administrative Heads of Office dang nungi temelaba agir ang sodi agitsüla" ta CS Sentiyanger-ia ashi.

AHODs aser HoDs-ia pei pei department den putepba aser tajangzük aliba workshops nung shilem agitsüla. Ketdangsurtemi senden mesüra workshop ajak nungbo madentsüla kechiyong iba ajanga ketdangsubaren nung timtem ajurur ta paisa ashi.

"Asenoki Sustainable Development Goals (SDGs) aser Viksit Bharat mangdang atongtsüla aser iba ya Chief Minister-i tawa Cabinet senden ka nung shiogo. Department shiai SDG targets kodaser atongtsü aser Viksit Bharat mission nung koma shilem agitsü ta asalentong tejangjatem yanglutsüla" ta paisa ashi.

Nagaland nung department ajak nungi osangtem bendener

State Vision 2030 document renem saka department kari dang vision plan nung aliba maparen inyaker ta Sentiyanger-ia tebilemstü ka lemsatop.

"Vision 2030 ya department ajak den asüngdangteper aser shilem agia yanglu anungji süoki ia bilemstüla. Kü office-i department shia dangi iba atema shidi zülutsü anungji department ajak renema alitsüla" ta paisa tetuyuba agütsü.

Senden nung Home Commissioner Abhijit Sinha, IAS-ia Assembly aser budget session tem nung Administrative Heads of Departments (AHODs) aser Heads of Departments (HoDs) adentsü nenshi.

Home Commissioner-ia department ajak dang Governor aser budget speeches jungjunga renemstü metetdaksü.

Finance Commissioner Kesonyu Yhome, IAS-ia AHODs aser HoDs dang Budget renemstüba indang lemsatop.

"Department karibo February ita tashi nung agütsütsü shiaka tang tashi Governor's Address aser Budget Speech atema osangtem magütsü lir" ta Kesonyu-ia ashi.

Yhome-ia Accountant General (AG) Office den ajurutepdang department aikati mapang shitak nung 'reconciliation of accounts' meinyakba tebilemstü metetba ashi.

AHODs aser HoDs-ia pei pei Accounts Sections dang 'reconciliation of accounts' mapang shitak nung inyaksü ashitsüla ta paisa metetdaksü.

## Assam nung electoral rolls bentettsü atema SR inyak: CEC Gyanesh Kumar

**Guwahati, February 18, 2026 (Agencies):** Assam nung electoral rolls indang Special Revision (SR) ya 'eligible voters' adentsü aser 'ineligible names' agientsü atema inyaker ta Chief Election Commissioner Gyanesh Kumar-ia ashi.

SR ya national security atema voter list nungi bendangtem agientsü nükjidong nung agir ta Kumar-ia osangbener dang ashi.

"Ozüng nung elections magidang electoral roll revisions agitsüla ta lateta lir. State 12 nung SIR agiogo aser Assam nung SR agi" ta pai ashi.

National Register of Citizens (NRC) process tera agi dang metembang inyakba state ji Assam dang lir aser iba jagi Special Intensive Revision (SIR) masü saka Special Revision

agitsüsa aküm ta CEM Kumar-ia metetdaksü.

Assam nung revision exercise ya tiptema inyakogo aser district balala nungi appeals 500 shi dang aru ta paisa ashi.

Assam Assembly elections ya April 13 nungi tenzüksü aliba Rongali Bihu festival matongdang agitsü asü ta osangbeneri asüngdangdang "Bihu ya Assam nung tongtipang benjung ka lir aser senden balala amendang tebilemba ashiba ajak angadanger elections indang lemtet agitsü" ta Kumar-ia langzü.

CEC Kumar aser Election Commissioner ana- Sukhbir Singh Sandhu aser Vivek Joshi nungeri Assam nung Assembly elections agitsü aliba dak sendakba maparen meyipa repringshitsü atema Assam nung arua amung.

## Dr. Rio-i JSW Shakti Women-Centric BPO lapoktsüogo



Chief Minister Dr. Neiphu Rio-i IBHIC, Dimapur nung JSW Women-Centric Business Process Outsourcing (BPO) lapokba sentong nung jembiba noksa nung angur.

**Dimapur, February 18, 2026 (TYO):** North east region nung mezüngbuba JSW Shakti Women-Centric BPO ka Chief Minister Dr. Neiphu Rio-i Dimapur nung sayatsüogo.

Bodbarnü CM Rio-i Integrated Business Hub and Innovation Center, Dimapur (IBHIC) nung iba BPO lapoktsü.

Nagaland sorkari Investment & Development Authority of Nagaland (IDAN) ajanga JSW Foundation den yaritepa iba centre amenokogo. JSW Foundation-i iba maparen ya inyaka arur aser parnoki rural India nung tetsürtemi dang ketdangsuba BPO centres lapoktsür.

"State sorkari tetsürtem entrepreneurship, skill development aser employment maongkatem agütsütsü atema mapatem inyaker. Lanutsürtem akhümketa aser tepok mesüa litettsü asoshi sorkari livelihood promotion, capacity building aser

digital inclusion tashi itshir" ta Dr. Neiphu Rio-i ashi.

"Tanü iba mapa ya kanga tongtipang alizüng ka lir aser onok mangdang den puteper. Iba ajanga lanutsürtemi tajangzük balala angutsü atema professional, technology-driven workspace agütsür" ta pai ashi.

"Investment & Development Authority of Nagaland aser JSW Foundation tsüngda tesentaktep ya kanga tajung kechiyong parnoki skills, technology, aser employment nung temulung agütsür. Tarutsü asoshi yangertsü atema item ya tongtipang tongshi asem lir" ta paisa metetdaksü.

"Iba ama tesentaktep ajanga public aser private sectors külemi longjemer maongkatem agütsütetba sayur. State sorkari akokba tashi employment adokdaksütsü, skills tashi itdaksütsü aser nübortem, talisa tetsür aser lanurtem ajungkettsü asoshi mapatem inyaksü" ta Dr. Rio-isa ashi.

"Iba sentong ajanga mapa adokba dang masü saka lanurtemi pei state sasep nung maongka tajungtem angutsü ta tamang kadaksütsü. Iba ya tetenzüker südakjang aser tarutsü anogotem ano tesentaktep aika yanglua maparen inyaka odakjangma" ta paisa ashi.

State sorkari akokba tashi asen külem linük yangerba nükjidongtem asoshi teyari agütsütsü ta JSW ketdangpurtem aser tanga corporate partners dang nangzüker ta CM Dr. Rio-isa ashi.

"Iba facility indang nükjidong ya nisung 125 anioktsü atema masü saka tarutsü itatem tsüngda Nagaland nung BPOs teimba akümsü aser nisung 500 bosa anioktsü atema JSW den jembitepdar" ta IDAN, Chairman Abu Metha-ia ashi.

Tang atema Centre manager aser Desktop Engineer dena nisung 25 shimokogo ta paisa ashi.

## ANATG tesayurtemi mapang telatet makai lungkak aittsü lemtetogo

**Kohima, February 18, 2026 (TYO):** School Education Advisor den lemtet kati maruteti senshiba sülen All Nagaland Adhoc Teachers' Group (ANATG) 2015 Batch tesayurtemi Bodbarnü mapang telatet makai lungkak aittsü metetdaksüogo.

Parnoki tanü agi anogo 12 buba lungkak aiter aser tanü NSF Solidarity Park nung lokti senden ka amendang parnok service regularization dak sendakba onüktem lemsatop.

Senden nung Core Committee-i yashi MLA & Advisor Dr. Kekhrielhoulie Yhome den Principal Director aser Directorate of School Education staff den senden amenba osang metetdaksü.

Lokti senden nung Core Committee-i district sasep den asüngdangya aser tebilemba bendenba mapang ka liasü aser idangji ANATG züngsemtemi jashiba metetdaksü. Sorkari parnoki agüjadoker aliba kulikakettem tanen makai meshiba

atema jashir ta parnoki ashi.

2024 nungi parnoki sorkar tetuyuba balala tashi angaa anidaka arur aser service regularization ateam nungdakba kulikakettem agütsüogo. Ajisüaka parnok dang kasa kulikakettem ano maneni agütsütsü meshir aser tatemsa Hombarnüa meshiogo ta tesayurtemi metetdaksü.

Parnok ket nung sanction post orders, appointment orders, aser release orders amala tongtipang kulikakettem mali kechiyong 2017 küm ULB election anema lungkak aitdang Education Office nung mi senoktsü aser idangji item records rondok ta tesayurtemisa ashi.

Parnok mapa nung mezüng shimokdang item kulikakettem ya jangiatepa liasü anungji kodaser onoki tang item kulikakettem agütsütettsü ta parnokisa asüngdang.

Department of School Education nung Principal Director-i June 27, 2025 nü

certification ka agütsüba nung June 6, 2016 matongdang shimokba contract aser adhoc employees ajak jangjaogo ta shia liasü ta ANATG-isa metetdaksü.

February 12 nü sangdong ka nung Department-i tesüiba küm pungu indang Annual Performance Appraisal Report (APAR) nungdaksü indang ashi. Ajisüaka, APARs ya adhoc mesüra contract staff-i masü saka regular employees-i dang ayur ta ANATG-isa jangjatsüogo.

Tesüiba küm ana tashi Department-i sangdong balala agütsüba ama onoki kulikakettem agüja arur saka iba onük atsulangtsü atema dang asaa inyaker. Department nung staff-i onok indang files tim mesüi amshiba atema tebilemstütem lemsatopogo ta tesayurtemi metetdaksü.

ANATG 2015 batch tesayurtemi mapang telatet makai lungkak aittsü aser akhangba ama meinyakra tuluba agia aotsü akok ta Core Committee züngsemtemisa ashi.

## Kiphire yimtsüng nung workshop ayongzük



Kiphire yimtsüng nung workshop ayongzük agiba sentong nung tangokba noksa nung angur.

**Dimapur, Tsüklai/February 18 (TYO):** Department of Art & Culture kübok Office of the District Cultural Officer, Kiphire ajanga Kiphire village nung February 17, 2026 nü living morung project kübok workshop ka ayongzük liasü, kong Langkok aser Longthonger yimtsüng nungia nüburtem dena liasü.

Traditional crafts aser

weaving nung tali temlung agüja iba workshop ya ayongzük, kong sentong akhumdong Tsidongchem, Chairman Kiphire Village liasü.

District Cultural Officer Kiphire, Moses Newmai ajanga iba sentong nung jembidang pei sobaliba aser ayak wazüka ayutsü ajungshia liasü.

Kiphire village nungi Head GB Tsalimong-i yimtsüng

kumtetba indang puti otsü ashi aser tanü tendak handicrafts aser weaving kota tongtipang ta asüba lemsatepa liasü.

Iba sentong nung Rebeca, LDA menden liasü aser Vilila Pojar, ARO Kiphire ajanga pela agizükba o jembi.

Iba workshop nung shisalen sayur Thsaopi Sangtam (Crafts) aser Zuzila Sangtam (weaving) liasü.

## Sekrenyi-cum-Mini Hornbill benjong amungtsü renemer

**Dimapur, Tsüklai/February 18 (TYO):** Sekrenyi-cum-Mini Hornbill Festival 2026 amungtsü renemshia Deputy Commissioner, Chümoukedima indang Conference Hall nung February 18, 2026 nü mena liasü.

Deputy Commissioner, Polan John, NCS lenisüba nung iba senden mena February 25, 2026 nü Sovima Village Council Ground nung iba benjong amungtsü atema renemshiba reprangshimtepa liasü.

Naga nunger sobaliba

benjonga local entrepreneurship temaba jenjangi ajungketsü nükjidong nung iba sentong takok ngua amungtsü atema department balala nungi ketdangsurtem adenshia senden amen.

Iba senden nung Deputy Commissioner-i jembidang iba benjongmung ya sobaliba tali jangjadaktsütsü aser rongsenketzüng tsütsü maongka lir, anungji department balala tsüngta amalitep akatsüla, ta ashi.

Senior Tourist Officer-i iba sentong indang tongmelang agi

lemsatep aser iba benjongmung nung shilem ka ama capacity-building session agitsü ta metetdaksü.

Chairman, Sovima Village Council ajanga iba benjongmung asoshi renemshiba, traditional games, tents, canopies aser departmental stalls yanglua indokba indang lemsatep.

Department 11 shi shilem agitsü jangjaa stalls tem amenokogo.

Iba sentong nung nisung timbai shilem agitsü mechi osang prokshitsü nüngdakba lemsatepa liasü.

## Wokha nung Floriculture aser Apiculture indang workshop agi



**Dimapur, Tsüklai/February 18 (TYO):** Cluster Development Programme for medicinal, aromatic, floriculture, and apiculture crops kübok Deputy Commissioner, Wokha indang Conference Hall nung February 17, 2026 nü workshop-cum-distribution programme on quality planting materials sentong ayongzük liasü.

Iba sentong ya District Administration Wokha aser CSIR-North East Institute of Science & Technology (NEIST), Jorhat tsüngta Memorandum of Understanding zülutepa aliba ama ICAR-Krishi Vigyan Kendra (KVK), Wokha den lungjemer ayongzük liasü.

Deputy Commissioner, Wokha, Vineet Kumar, IAS

ajanga iba sentong nung jembidang, district ya tanemtanemi cluster framework kübok model ka kumdaktsütsü nükjidong lir, kong aonsotsü ya lisa den apet aser market nung bushiba ama shimtsü ta ashi.

Chamomile ya ita asem nung züsenteter aser senotsü arutsü lenmang aliba mechi floriculture crop tapet asütsü ta jangjatetogo, ta pai ashi.

Pai apiculture aser floriculture lungjemdaktsüba indanga rateta ashi aser phases lemsar bee boxes 100 shi lema agütsütsü aser kasa mapang tejangrar telok, talisa Bhandari aser Wokha village areas nungi nüburtem asoshi training ayongzüktsü, ta metetdaksü.

Quality testing aser talir tem den sendaktsütsü asoshi CSIR-

NEIST den lungjemer market linkages agütsütsü ta Deputy Commissioner-i metetdaksü.

Pai aluyimer dang iba sentong nung kibur ama akumtsü ayongzük aser administration ajanga akokba lenmang nung yaritsü ta ashi.

Senden nung Skill Development Officer, Anuranjan Singh menden liasü aser pai department balala tsüngta amalitep akatsü aser scientific intervention indang rateta ashi.

SMS (Agricultural Extension) and CTO, ICAR-KVK Wokha, Dr. B. L. Mhalo Tungoe-ia iba sentong nung jembia liasü.

Sentong tembanga teshimtet nisungtem nem quality planting materials lema agütsü.

## DoTE-i Allied & Healthcare Professions atema metetdaksü

**Dimapur, Tsüklai/February 18 (TYO):** 2026-27 academic year nungi tenzüka graduate aser post graduate levels atema Allied & Healthcare Professions asoshi curricula balala 13 agitsü ta Government of India, Ministry of Health & Family Welfare, National Commission for Allied & Healthcare Professions (NCAHP) nungi osang aruogo, ta Directorate of Technical Education ajanga sangdong ka nung metetdaksü.

Curricula metetdaksüba

timba nung admission atema eligibility criteria kaji National Eligibility cum Entrance Test (NEET) agütsü aser tema asütsü. National Commission for Allied & Healthcare Professions ajanga curricula tali sangdongtsü inyaktepba mapang lir.

Jangra aliba candidates temi Commission indang website

-<https://ncahp.abdm.gov.in/Curriculum> nung osang tali tejangjaba angutsü, ta sangdong ajangasa ashi.

## ADC Medziphema ajanga metetdaksü

**Dimapur, Tsüklai/February 18 (TYO):** Additional Deputy Commissioner, Medziphema ajanga sangdong ka nung Jharnapani aser Molvom tsüngta aliba apu ya raksar yanglutsü aliba mechi iba lenmang shibangogo, ta metetdaksü.

Iba lenmang nung February 18, 2026 nungi tenzüka gari kecha

mesenzütsü.

Senzüsemponger tem dang iba melen Tri Junction-Cattle Breeding Farm (towards SAS) - Dzumha river ajanga senzütsü ajungshir.

Iba apu meyangluzük tashi aser District Administration ajanga tarutsü nung sangdong ka magütsü tashi iba totuyuba ya amshitsü, ta sangdong ajangasa ashi.

## AR-i Jalukie nung parenting workshop ayongzük



**Dimapur, Tsüklai/February 18 (TYO):** Assam Rifles-i Peren district kübok Jalukie nung mitkartem tongshi akangshia "Parenting with Bonding and Attachment" workshop sentong ka Rubaru Programme kübok ayongzük liasü.

Tetsü aser tanurtem tsüngta tesendaktep tali adokdaktsütsü nükjidong nung iba sentong ya yanglur agia liasü.

Station-i aruba kibong tasentem pela agizükba sentong tenzüka.

Iba sentong nung tetsü temi

military environment nung "Happy Moments" aser "Difficult Moments" ajangshibatem lemsatepa liasü.

Iba mapang parnoki pei tanur indang noksa amshia parnoki ajangshiba otsütem tali rajemja shilem agirtemi tajangshiba balala angateta liasü.

Sentong nung tanur temi tain dak nungi yimya balala ajizüka amshiba indang sayua kibong tem tangazükba tajung liasü.

Iba sentong ayongzükba asoshi sepai kibong temi pelaba lemsatepa liasü.

## Dimapur nung mejangjaba nisung tasü mang ka nguteta lir

**Dimapur, Tsüklai/February 18 (TYO):** Mejangjaba nisung (non-local tebur) tasü mang ka Traffic Control, Dimapur Office anasa Flyover Bridge tsünglanglen nguteta lir, ta Traffic Control, Dimapur nungi February 17, 2026 nikongdang 3:00 ako meta telephone ajanga osang ka aru.

Iba sülen duty nung alirtem iba tesemi ao aser arishi küm 55-60 tsüngta nisung tasü mang ka pillar nung metaloka aliba ngutet, ta Dimapur Police sangdong ka nung ashi.

Yangji bushisüngdangba sülen nisungba ya yasetta aser shiranga asüba südi ta temlung melemteti lir.

Ozüng agi melaba maparen ajak tembangba sülen tasü mang ya PM examination/identification atema District Hospital Dimapur Morgue nung bener oa lir.

Kibur/kinunger/tembar temi Officer-in-Charge, East Police Station Dimapur den Mobile No.7085055020 ajanga tongtepratepsü ayongzük, ta sangdong ajanga ashi.

# State 10 nung Rajya Sabha menden 37 atema election agitsü

**New Delhi, February 18 (Agencies):** Bodhbarnü Election Commission (EC)-i March 16 nü state 10 nung Rajya Sabha menden 37 atema election agitsü aser kasa anogo nungjisa vote zünga osang sangdongtsü, ta metetdaksü.

March 16 nü anepdang 9:00 ako nungi nikongdang 4:00 ako tashi election agitsü aser nikongdang 5:00 ako nungi vote azüngtsü, ta election commission-i metetdaksü.

Taküm April ita nung Raya Sabha nung menden 37 azüngtettsü aliba agi iba election agitsüsa akümer, ta election ketdangsertemi metetdaksü.

Iba election atema sangdong February 26 nü agütsütsü,

nomination file asütsü atema tatembangbuba anogoji March 5 asütsü aser March 6 nü nominations reprangshitsü. Candidate temi March 9 tashi nung tenüng agientsü akok.

Rajya Sabha nung menden 37 azüngtettsü, aser item menden atema state ter-Maharashtra (menden ter), Odisha (menden pezü), Telangana (menden ana), Tamil Nadu (menden trok), Chhattisgarh (menden ana), West Bengal (menden pongu), Assam (menden asem, Haryana (menden ana), Himachal Pradesh (menden ka) aser Bihar (menden pongu) state tem nung election agitsü.

Kobi melii Rajya Sabha nung kümsük abensatsüpur MP

tem rongnung Upendra Kushwaha, Priyanka Chaturvedi, Tiruchi Siva, Saket Gokhale, Ramdas Athawale, Abhishek Manu Singhvi, Sharad Pawar, Bhagwat Karad, Mamata Mohanta, Rameswar Teli, Indu Bala Goswami aser Kavi Tejpal Singh Tulsi nung densema lir.

Iba election teladak süa agitsü atema election commission-i state shia nung observers lezmütsütsü aser Returning Officers-i ballot papers nung violet sketch pens dang amshitsüla, ta tetuyuba agütsüogo.

Ano taküm küm tatembanglen Rajya Sabha menden 35 atema election agitsü.

# Sena (UBT)-i opposition INDIA teloktep saaksalemstsü ayonger

**New Delhi, February 18 (Agencies):** Bodhbarnü Shiv Sena (UBT)-i opposition INDIA teloktep dang saaksalentsü aser state aika nung assembly election agitsü lia o lemtep tenzüksü ayongzük.

Shiv Sena-i, opposition teloktepi asalentong yanglutsü atema election agitsü sangdong matatsüla saka asalentong yanglu tenzüksüla, ta ashi.

"Telung nung ratamataba ola aika lir, Mamata, Stalin mesüra tangar kar?" ta asüba yimobilem ajanga Shiv Sena-i, "Kodang election sangdongdir INDIA teloktepi saaksalemer o lemtep tenzüksüla. Ajisüaka iba dakji alia shisa akatsüla aser longjemer telemtetba agitsüla," ta metetdaksü.

"Mahatma Gandhi ya Congress aser linük naprongla

atema lenir liasü. Gandhi dak telung nungi ola liasü aser ibaji ajanga pa telemtetba ajak lenidaksü. Tanübo Congress nung telung nungi adokba ola aika lir aser ibaji ajanga ratamatadaksür. Iba ya linük atema majung, state pongu nung assembly election agitsü lir. Mani Shankar Aiyar, Sanjaya Baru, Bhupen Bora aser tangartemi mapang balala nung ola adokogo aser ibaji ajanga Congress nung ratamatadaksür," ta Shiv Sena-i metetdaksü.

Tawa Sanjaya Baru-i, INDIA teloktep ya West Bengal chief minister Mamata Banerjee nem anidaksütsüla, ta tebilemba lemsatapa liasü.

Ano külen Mani Shankar Aiyar-ia INDIA teloktep ya Tamil Nadu Chief Minister Stalin nem anidaksütsüla, ta

tebilemba lemsatepogo.

Tamalen taoba mapang Ato kilonser Manmohan Singh atema media adviser, Sanjaya Baru-i, lenir tasanpur ka nem INDIA teloktep anidaksütsüla, ta shiogo.

Paisa, tang tetsürtem rongnung yimtenren party ka nung tongti aser state ka nunga tongtiji Mamata Banerjee dang lir aser la ya tan putu lenirtem rongnung national aser regional level naprongla nung takutet lenir ka, ta ashi.

2026 küm assembly elections state pezü West Bengal, Tamil Nadu, Assam, Kerala aser Union Territory Puducherry nung agitsü.

Kobi melii Election Commission of India (ECI)-i state balala nung assembly election agitsü atema sangdong agütsütsü.

## ALIMA TETSÜ OSHI ANOGOMUNG (International Mother Language Day)

### Tayonger:

Dimapur Watsü Telungjem aser Ao Kaketshir Telungjem Dimapur Tsüklai (February) 21, 2026. Küptoknü (Saturday) **Tesentepdak:** Sümedem Tenla Ki,DABA. **Mapang:** Anepdang 9:00 Ako.

### Omen:

*Oshi Aika Meteta Jembiba nung Lanurtem Ola (Youth Voices on Multilingual Education)*

### SENTONG

- Akhümdong : Wt. Aotula Imchen, IPS Commissioner of Police, Dimapur.
- Sentong Lenir : AKTD.
- 1. Sarasademtsü : Wt. Amongla Aier Associate Pastor, DABA.
- 2. Tepela o aser Anogomung Ratet : Tir, DWT.
- 3. Osang Tajung Ken Tentepba Mapang : Mezüng Telok (Group 1.)
- 4. Tajungshi O : Tir, ASTD.
- 5. Osang Tajung Ken Tentepba Mapang : Tanabuba Telok (Group 2)
- 6. Akhümdong O : Wt. Aotula Imchen, IPS (10 minutes)
- 7. Osang Tajung Ken Tentepba Mapang : Tasembuba Telok ( Group 3 )
- 8. Zülumen Shitet ( Spelling Bee ) : Tir, AKTD.
- 9. Melepzüng O : Tir, AKTD.
- 10. Sempet Agütsüba mapang : Tir, AKTD.
- 11. Tatem Sarasadem : Telok.

### Temeteltsü:

- Iba sentong nung ajaki asen Aotsür-Aor sübutsü akhüm keta sübor arutsü metetdaksür.
- Sentong temer telok külemi chiyongba mapang alitsü.
- Iba sentong takok asoshi ajaki sarasadema atadi.

# PM Modi-i Kazakhstan PM Bektenov den senden amen



February 18, 2026 nü New Delhi nung AI Summit aliba mapang Ato kilonser, Narendra Modi-i Kazakhstan Ato kilonser, Olzhas Bektenov den jurila senden ka amentsü lia tangokba noksa nung angur.

# Israel tsür raksatsür nisung 3 nem tasüba temerenshi agütsütsü

**Bengaluru, February 18 (Agencies):** 2025 küm Hampi anasa Israel tsür ka aser homestay kibur ka na tashiyim amshia raksatsüba ken o nung Karnataka nung court kati aibelener asem nem tasüba temerenshi obendang agütsüogo.

Gangavathi nung aliba First Additional District & Sessions Court-i February 6 nü tebur asemji aija liasü aser Hombarnü temerenshi obendang agütsüogo.

Judge Sadananda Nagappa Naik-i, aibelener asem- Mallesha

(Handimall), Sai aser Sharanappa nung nem tasüba temerenshi obendang agütsü.

Yaküm March 6 aonung raliwalir telok ka Sanapur awatsüngi oa liasü aser parnok rongnung arrshi küm 27 Israel tsür ka, arrshi küm 29 homestay kibur tetsür ka, America nung ka, Odisha aser Maharashtra nungi tebur kaka liasü. Parnok Tungabhadra canal anasa mener ken angaba mapang nung tebur asem motorcycle nung aru.


Tebur asem jagi parnok dang sen meshi saka sen magütsüba

agi mangatettep adok. Iba sülen tebur asem jagi raliwalirtem dak azükba sülen tebur asemji ayong nung nungoktsü.

Iba sülen tebur anati tashiyim amshia homestay kiburji raksatsü aser kati Israel tsür anema tashiyim amshi. Iba sülen parnoki mobile phones aser sen auyar ajen.

Raliwalir tebur asem rongnung kabo tzü nungji arakseta asü aser tasümgangi tasüngnep ang nguteta liasü.

Iba tatalokba sülen ita 11 shi lir aibelener asem nemji tasüba temerenshi obendang agütsü.



February 17, 2026 nü Bhopal nung Madhya Pradesh Assembly nung opposition lenir, Umang Singhar den opposition MLA temi state Assembly kima longkak aitba noksa nung angur.

**New Delhi, Tsüklai/February 18 (Agencies):** Bodhbar New Delhi nung AI Impact summit aliba mapang nung Ato kilonser, Narendra Modi-i Kazakhstan Ato kilonser Olzhas Bektenov ajurua tena jurila senden ka menogo.

Lenir anati linük ana tsüngda lenla balala nung tesendaktep tashi itshitsü atema o lemtepa liasü, ta Ministry of External Affairs (MEA)-i metetdaksü.

Lenir anati shishilembaba, defence & security, connectivity, energy aser technology densema lenla balala nung amalitepa inyaksü atema jembi.

Bodhbarnep Bektenov New Delhi tonga aruba mapang nung tayimtsü anendak Minister of State for External Affairs, Kirti Vardhan Singh-i pa agizüka liasü.

Tang AI Impact summit aliba ajanga India aser Kazakhstan na tsüngda tesendaktep ano tajungba akümtsü imlar.

New Delhi nung India AI Impact Summit 2026 ya February 16 nü tenzüka liasü aser February 20 nü tembangtsü. Bodhbarnüsa Ato kilonser Modi-i Croatia Ato kilonser Andrej Plenkovic, Google CEO Sundar Pichai, Serbia Tir Aleksandar Vucic, Finland Ato kilonser Petteri Orpo aser Spain Tir Pedro Sanchez nungera ajuruogo.

Tang AI summit nung adeneritem rongnung UN Secretary-General Antonio Guterres, Seychelles tatong tir Sebastien Pillay, Mauritius Ato kilonser Navinchandra Ramgoolam aser Sweden Deputy Ato kilonser Ebba Busch nung densema lir.



## TIR YIMYIM YIMOBILEM (EDITORIAL)

DIMAPUR THURSDAY, FEBRUARY (TSÜKLAI) 19, 2026

### Bendangertem tenüng züluok tenzüker

**N**agaland nung Nagaland state kümteter külen aruba bendangertem, tang tashibo, shinga Nagaland nung senso küma alitsü makok, anungji parnok tenüng nung Nagaland nung kimong lumong alitsüa makok aser kiojen yanglutsüa makok aser parnokji Nagaland nung amongtsü atema temelaba nungdaksü. Iba temelaba dang Inner Line Permit (ILP) ta ajar. Atangji, ILP ya Nagaland nung dang masü saka Mizoram, Arunachal aser tangbo Manipur state nunga amshir, anungji asenok Nagaland nung alir Naga nungertema item North East state-tem leni aodangbo ILP nungdaksü. Atangji, Tsüngremi asenok nem moatsüba Naga lima nung yabo asenokbo azüng zülua memeteti aliba mapang, pi anülulen nungi British nungertem arua India nung yimsüsüba mapang, 1873 küm Naga nung aliba tenemi bendanger shinga temelaba melii matutsü asoshi ILP ozüng ya latet, iba ozüng dang Bengal Eastern Frontier Regulation (BEFR 1873) ta ajar. Iba kasa ozüng ya 1947 küm India yimten nüchiso ngur külena amshia aru aser 1960 küm Nagaland state akümtsü asoshi latetba "16 Point Agreement" nunga enoksema Nagaland state nung maneni mapa küma amshitsü lemtet. Iba jagi tanü tashi, Dimapur nung tesem kar dak alaka, Nagaland state tesem kecha nunga tsümartem senso küma alitsü makoker. Aji oda, Nagaland state ya asenoki bilemba ama renloka moutetaka, tanü tashi Nagaland nung Naga nung li tangar bendanger dang meyoki kümzüka yutetba ya, iba ILP ozüng aliba ajanga asütsü. Iba ozüng ya malika asübo, ashiko, Nagaland nung tanübo tsümar li tuluba aser Naga nung li tilaba ser, bendangertemang kibur aser lisopurtemang bendanger ama kümer lila. Ajisüaka, ano jungjunga bilemdangra, tanü tashi nunga Nagaland nung ali aser nübortem jenjang wazüka ayutsü asoshi latetba ILP ozüng ya shitak amshia moutetba tamakok aika lir. Itemji asenoki asen lima aser nübortem tarutsü tia indang süoki ia mebilemi tanüa tanü ajunga asaa inyakba ajanga meteta aser memeteti zübazübaa toktsüba lendong mapa ka asütsü. Aji oda, asenok tarutsü atema ya asenok dang nungibo British aser India nungertemia tebilemtsüba bilema iba ILP ozüng ya lateta toktsüogo ta angateter. Atangji, tangbo asenoka terabo nüchi küma arur asünungji, Nagaland nung Dimapur nung dena ILP ozüng ya shitak akangakanga amshitsü asoshi state government-i telemtetba agiba sülen inyakyim tasen aika bendenloka inyakba ajangshir. Item inyakyim tasentem rongnung tongtibang kaji, bendangertem ILP bener arua alir ki kibur aser bara nung alirtem na pronglaji Nagaland police-i meteta parnok inyakyim kübok tenüng züluoktsü asoshi tenzüka mapa ya ka asütsü. Anungji, tangbo Nagaland nung Nagaland police-i memeteti ILP alirtem Nagaland nung alitsü makoktsü. Kasaji, ILP abenertem aliba ki kiburtem tenüng aser talidak indang temetetsü ajak Nagaland police dang shia züluokdaksütsü asoshi ozüng küma lateta lir. Iba jagi, atangji, Nagaland nung bendangertem arua aliba shitak jangjatsü aser lendongtsüdong mapanga teyari aser teküzmükdak melamelaa bushitetsü. Shitakba nungbo Nagaland nung ILP amer dokan lapoka kümsa küm alitsüba ya BEFR 1873 ozüng anema lir, anungji tsümar ka Nagaland nung dokan kibur akümtsübaji tamakoktsü, saka asenoki kümdaksür aser asenoksa akoksar. Atangji, tang tangbo asenoki ILP abener tsümartemji medenibo asenok asoshi mapa aika meinyaktetsü, kechiyong asenoki longki tulu talang meyaglütetsü aser yanglutsüa nüboa peria mali. Ibaji dang masü saka tsümar nübo medeni alua meyimtetsü aser dokan a memetetsü. Ibaji meteta asenoka tanemtanemi parnok bendangertemji medenia asenok nungdakbo inyaketsüsa aser dokan a mentetsüsa, tang parnok asenok den alidang, asenoki parnok den külemi inyaka parnok nungi mapartemji angazüksüla. Parnok yamaji tangartem nungi mesüra taintem nungi tanur asüdangyongi mapa inyak angazüka intetba purtem lir. Iba amajika asenoki tang nungi parnok nungi mapa angazük tenzüka meinyak nungbo, ILP ozüng aliyonga ILP abenertemjiang tang nungi küm noklang majung dang Nagaland nung kibur kümadoktsü. Yamaji tanak nisungtema America nung senso akümba otsü asenoki jembir.

## OLEMSABANG

### AKÜMLIR MONGJEN :

- Talitemjen Imchen

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem)

(Yash adok nungi...)

Tiapetzük sür lepkhumong amongba mapang, anüng tom talang nungi temalen aruba Mongzü ana densema Mongzü telok ka aru. Mongzü telok rongnung, kar tulu kar tila saka tereprangtsü sentsübo ajak kasasa, salo ka dang arur anünglak nungji yimzü. Mongzü telok nungi ana, teira ka aser latu ka (young one), alilen-i yimzüka alur, Tiapetzük-er kilem ji meküta yimzümeso. Teira Mongzü ji tashikang külen tezüng ana mali angu. Lepkhumer rongnung kari ya temaitsü balaka, atetapongtsü lir ta süngmanga repringtep. Kari yimti nung atsükalok asütsü ta tsübu. Yakta Mongzü ana ji odaktsünüa, kari longsang aser süng temeritem anüng jagi paküta yuk. Saka Mongzü ana jagi anasaba alilen-i alua, ki kilem nungji dangshitetsüsaka yimzümeso. Mongzü ana yimzüba ngua, lepkhumonger benputepba ji Sangrona-i angashi. Lai telok chiyungba nungi, chi tila ka aser aon tila ka kenteta bener kimai alua, "Kü kinüngbo Tiapetzük aser tayimer ka ji shibar," "Nena pelatepa chiyunger ilunga nena talidaki tasenang ni" ta shir yimzüa alidak tesem jagi, chi aser aon ji paküta yuk. Iba sülen lepkhumongertem-i repringa lia, Mongzü anaji anüng talangbalen-i yimküta atu aser yimzüa ataba telok den ji densemer meyipa ao. Parnoki anüng tom nung tila küma samaa ayimba tashi, Mongzü telok ji repring.

Asür Tiapetzük lepkhumong abensaba aonung, kinüngtsüi pongmang ka pongmang. "Kü melungdokla Sangrona, ni tsüdi ayung ajanger lenmang talang jajatsü lir," "Yimti tiyung nung aliba nükshitong ya ni ajok mechir apusodi." Tasüngnü anepdang, kima kilong ajak merükteta okdokba mapang, yimti nung Lajar Melusang süogo ta osang aru.

Lai yasüng pongmang ji yimdangi arua, Melusang o Tiapetzük na den asangsang nung ano külem-i khen mensemer ama bilemer, kanga menungra ait aser la tenük nung nüktsü atsüngba ji, süpeti talaklen ji bener tur nüksü ji aidok. Yimti nung Melusang ji Tiapetzük-i kanga dang meima aliba asangur ka liasü. Sangrona-i Melusang sür külen, kinüngbo lepkhumong mapang Mongzü ana aruba tereprangtsü bilemtet. Asangsang nung kinüngbo tepu tekalen tsütsü ana mali, iba jagi Mongzü teira tashikang nung tezüng ana malir ta bilem. Mongzü tilabaji Melusang tanela asütsü ta dakzü. Lajar süaka, kinüngbo-i kanga meima aliba Melusang, akümlir nung pa kija timtema melidaktsünüba agi, teti asoshi anisüngzükdaki kinüngbo den ogo ta lai amang. Melusang lajar sensaker asünung leplongtsü pakti tashi mali, temeimer mali, lepkhumong-a mamong, au tera agi tasümgang ji alentepe bener oa, yimer lep metongdak tesülen metonga yutsü. Anogo ishika süir külen, yimti nung tainer (samen) kati benjong tulu ka ayung. Terasatsüka, benjong kibur Tainer jala tanutsüla Tongsangna, benjongdak chisemer süchia ao. Kinüngertem-i aritepe la kümzüksü asoshi tangmo bushia menakdaksü aser la temang nung ajetshia tanela meyipa arutsü asoshi tashi agi la tenüng ajameso. Kinüngertem-i la tenüng ajaba ji angashir, saka iba jagi la tali mimperonga aküm. Lai kinünger nungi yakta pilar onü. Saka parnok-i lenmang satema magütsüi nokdakadokba agi asema meoteter. Anarongtena kinünger telok nungi adoker, moapu tulu ka nung indang indanga mepong den sako la asemmeso. Tsü merusepi teti ayimba ayungnu tila ka lai ajuru, Lai ayungnu ji alemdanger külen asema mapang moapu ji tuluba küma ajuru. Tongsangna-i yakta dang molu lima aliba tasüaküm ayung ji atong. Lai melu lima nungi tipu lima ji atongtsü kanga merang. Saka ayung kanga tulu, ayung jagi la ponger aotsü tsübu ayungküm nungji nokdak. Lai ayung külen oji nungi, tipu lima ji repringa yuk nung, tabenlen tsütsü airong agi sünger aliba tesem ka, alima nung takar alibatem tesa, kanga timtema ayakakotena jeptepba angu. La kanga dang aoksar tachichilen tsütsü ji repringa yuk. Kikümji long agi mekütpanga yangluba kiküm, temeküttemji long agi akanga akanga atsü atsür angu. Longki ji kanga tulu la tenük agi repringer merepringmar, Lai longki süngkhüm nungji Tiapetzük o Melusang na den külem-i aso tulu sentsü tajungtem tewangwang sü abener, tena tesülen meren merena nokdaker angu.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

## Myanmar kübok Chin state nung Tenla ki tasen ka semzükogo



**February 18, 2026:** Myanmar nung tensa mejungi liaka Chin State nung Tenla ki tasen ka semzükba ajanga Khristanem ajungmesor, ta osang ka ajanga metetdaksü.

2021 küm sorkar atsüngdoka sepaitemi yimsüsü tenzükba sülen tesem aika nung Tenla kitem raksatsüogo aser mapang shia Khristanem anema inyaker.

Myanmar nung Khristan nütsüing teimba aliba state ji Chin State dang lir. Iba state nung nüburtemi sepaitemi yimsüsü anema rarar, ibayongji sepaitemi Khristanem anema inyaker.

Iba ama tensa ka nung February 12, 2026 nü Chin state kübok Matupi nung St Joseph Arogo indang Tenla ki tasen ka meshiteta semzükogo.

Tenla ki tasen semzükba ya ajanga Khristanem nem teimla tasen ka agütsür aser aika ajungmesor. State tesem balala

nung sepaitemi Tenla ki aika rongdoktsüogo aser Tenla ki aika bomb/shells agi poksatsüogo.

Yaküm April ita nunga Falam nung aliba Christ the King Arogo Tenla ki bomb agi raksaja liasü aser February 2025 nunga Mindat nung aliba Sacred Heart Arogo Tenla ki raksaja liasü.

Hakha nung Bishop Lucius Hre Kung leniba nung Tenla ki tasen semzükba sentong agi.

Iba sentong nung jembidang Kung-i, tang Tenla ki tasen meshiteta semzükba ya pelateptsü mapang ka aser Arogo otsü nung tetezü kanga aketba mapang ka, ta ashi.

Paisa, küm aika tamangertemi sentong yanglua, sarasadema aser senotsü bendena aruba sülen nübo tenla agüja iba project renemogo, ta ashi.

Paisa, tang Tenla ki tasen renemtetba ya Tsüngremer temeim temaitsü lir, talisa

timtemba aser tensa mapang tamajung liaka iba mapa renemtetogo, ta ashi.

Paisa, Tenla kitemji raksatsüet saka tamangertem melungjang nung tamangbo teti alitsü, ta ashiba den külemi tamangertem dang sarasadem nung longjema alitsü aser teimla mesamatsü ayongzüka liasü.

2021 nungi sepaitemi yimsüsü tenzükba sülen sepaitemi yimsüsü anema telok aikati longjemer rara aser item teloki Chin State tesem tulubaka agiogo. Tangbo Chin state ya "liberated zones" rongnung ka lir, ta züngshir.

Chinland Defense Force aser Chin National Defense Force na densema telok balalai Chin National Front aser Chin National Army den longjemer sepaitemi anema rarar.

Tang Chin State nung nütsüing 500,000 dak tema lir aser iba nungjagi nütsüing shilem 85 bo Khristanem lir. Chin state nung Baptist Khristanem teimba lir aser Catholic Khristanema 70,000 shi lir.

2021 nungi 2022 küm tetenzüklen tashi nung sepaitemi mapang shia mita aoba ajanga Thantlang jila nungbo nütsüing 10,000 shi jenshiogo. Iba jila nung Tenla ki 22 liasü saka tangbo Tenla ki ka dang lir. Iba jila nung Catholic, Methodist, Presbyterian, Pentecostal aser Seventh-day Adventist Arogotem indang Tenla ki aika raksatsüogo.

## BGEA crusade nung nisung noklang aikati Khrista agizük

**February 18, 2026:** February 14-15 anogotem nung Billy Graham Evangelistic Association (BGEA)-i Argentina kübok Ushuaia nung ayongzüka agiba 'Ushuaia Hope Festival' nung nisung noklang aikati Yisu Khrista agizükogo.

Iba sentong nung BGEA Tir, Franklin Graham-i sayutsüing liasü.

Iba region nung tamangertem shilem ishika dang lir; tawa iba region nung nisung noklang aikati pei tamang jenjang aintsü atema training course ka renema liasü.

Ushuaia yimti ya Argentiba yimtiba Buenos Aires nungi kilometer 3,000 shi pilar lir, aser iba yimti ya alima nung 'south' tsütsü tatabanglaktiba nung aliba yimti lir, ibayongji iba yimti dang "The end of the world" taka ajar.

"Esperanza Ushuaia" outreach ya iba yimti nung aliba José "Cochocho" Vargas Stadium nung agi. Argentina nung nisung teimtiba soseta asüba yimti Ushuaia lir, ibayongji nüburtem den Yisu Khristai agütsüba teimla lemsateptsü nükjidong iba sentong omenji "Esperanza Ushuaia" ta aja. Esperanza tetezü asen oshi nung 'Teimla' lir.

Iba sentong nung jembidang Franklin Graham-i, "Nü taküm

nung teimla samar asü?" ta asüngdanga liasü.

Billy Graham Evangelistic Association-i ashiba agi, iba sentong nung Franklin Graham-i Mark tapu 10 nung shia aliba nükpoker ka otsü nung ajemdaker Tsüngrem O jembia liasü.

Graham-i, "Bartimaeus dak teimla maliasü. Shingaia pa meyaritetsü ta pai bilema liasü. Pa lenmang tiplen mena liasü aser pai kecha meinyakteti liasü, ajisüaka pai Yisu matsüngdang ayimden," ta metetdaksü.

"Kasa yimya nungji, nü menen pungdoktsü atema nai kecha meinyaktetsü. Nai nü sasa mekümzüktetsü. Taonung nai Khrista matsüngdangi arutsü asü?" ta pai lokti ayongzü.

Sentong ana tashi nung pai sayutsüingiba sülen nisung noklang aikati temenen nangzü.

Ushuaia yimti nung nütsüing 100,000 shi dang lir, ajisüaka iba nungjagi nütsüing shilem 10 shi dang Yisu Khrista den tesendaktep lir. Pastor tem aser Khristan lenirtemi iba festival akaba ajanga yimti nung dang masü saka region tesem ajaklen asentenshi milak jangrutsü teimla tulu aliba lemsatepa liasü. Festival of Hope Ushuaia ayongzüka akaba ajanga Arogo nungi pilar alirtema aika tanaben Arogo dangi meyiptsü imlar aser mamangertema aikati Khrista agizüktsü imlar.

tokshi, arem aser tasemnübuba nung Pa shia aru. Temenen nangzüka Yisu Khristaji pei Kibur ta agizükba atema onoki Tsüngrem nem sentsüwangshi ajak agütsür," ta metetdaksü.

Sayutsüingir Franklin Graham-i Argentina semdangtsü ta BGEA-i osang sangdongba sülen pastor Fabijn Rotenberg aser pastor Javier Campero na linük yimtiba, Buenos Aires-i oa Hope Festival ji Ushuaia yimti nung ayongzüka agidaksüner, ta mepishia liasü.

Iba yimti nung Hope Festival ayongzüka akatsü jangjaba sülen yimti nung Arogo lenirtemi Christian Life and Witness Course (CLWC) training course ayongzü aser nisung 2000-i iba course renema liasü.

Ushuaia yimti nung nütsüing 100,000 shi dang lir, ajisüaka iba nungjagi nütsüing shilem 10 shi dang Yisu Khrista den tesendaktep lir.

Pastor tem aser Khristan lenirtemi iba festival akaba ajanga yimti nung dang masü saka region tesem ajaklen asentenshi milak jangrutsü teimla tulu aliba lemsatepa liasü.

Festival of Hope Ushuaia ayongzüka akaba ajanga Arogo nungi pilar alirtema aika tanaben Arogo dangi meyiptsü imlar aser mamangertema aikati Khrista agizüktsü imlar.

## ANOGO ABEN TSÜNGREM DEN

### Talangi atuba

"Aser pai ni Tanela nung tenem tulu talang kati anir atu..." J.Adok 21:10

Iba ama mapang nung asenoki tebilemba balala aika adoker. Alima nung mapa tulu adoka temelenshi adoker. Kijaji kodanga yareta makümer. Aji oda liaka mapang ajak nung tebilemstü tulutibaji kija takümü lir. Iba dang tali ajak metetsang kodaker Tebui nisung ka kisüing yimsüsür inyakba ama telok dak meinyaker. Meimchir Tsüngrem mesükba nung yanglu nungji, petinu tulutibaji meimchir dang nungi tilaba lir. Ajemalutiba tamanger kajia orion aser pleaidas yanglusang senti züi Kalvary kangki nung alizük nung pa/laji senti lir! Teti dang repranga aliba Tsüngrem tenükji kija taküm shia repranga nüka lir ta tangatetba asenoki iba küm tasen tenzükdi.

Khristan ka ama tanü tensa terenlok ajak asenoki tenem kolak nungi reprangtsüla. Asenoki temejujket nung noktak nung dang talang nung aliba angutsü. Ali telemok nung mener alima tebur tajungji mangutsü. Ajungket nung mangdang angur. Asenoki lenden tuluba aser metong talangba nguner asenok tenem temejong nung noktaksüla. Yohan dang Tasen Yirusalem sayutsü atema Pa tenem tulu talang kati anir atu. Ibai masüdang Pa tzüym küm nung notaker Tsüym tarok nungji adokba shiruru ngua liasü (J.ADOK 13:1). Tanüa asenoki tawa- tanü lima nungi adokba shiruru aika angur, aser ishikadidang "Tasen Yirusalemji" anüing nungi aluba angur! Aika teküpboklen Tsüym kümbang nung alir. Idakji tepuatsü aika dang lir. Idakji TV aser radio nung inyakerem alitsü. Anungji idakji anogo shia osang kakat adoker. Magazinetem adoker. Idakji leman nung sensakasenba aser business alitsü.

Khristar nübur alima tzüym jenjanga alitsüba kodanga masü. Asenoki tenem kolakji reprang, shidakba tangatetba nung rangloktsüla, shidakba tangatetba bushitsüla. Asenok tensa tatalokbatemji ain kar shin o den medemdanga, Tanela Temeshi tenük ajanga, Tsüngremer nükjidong aser Khristai tatem nung takok anguba nung rangloker angatetsüla. Asen mapang nung tzüym nungi adokba shirurtem jaki memeteti "Tasen Yirusalem" asoshi terenemba akar. Tatamsa Kibubai takok angutsüba kuli asür.

Saka asenoki anogo shia taküm nung iba mangdangji koda ayutsü? Asenoki Laishiba anasa alitsüla. Asenoki Tanela jashidaktsüba mapa, aser telung nung pa kuli asüba anema kümdangtsüla. Tanela Temeshi dak metaloker asenoki küm tasen terenemba lemtetsüla.

Asenoki küm tasen nung item tezüngzüktepba Kibuba den yanglura iba tetezü mejembitetba temoatsütem angutsü. Ni anogo shia sarasadem nung minute semer dak tajemba magütsütsü. Ni hopta shia nisung ka dangbosa Kibuba indang kuli asütsü. Ni anogo shia Tejen aser Tasen Lai nungi maneni azüngtsü. Ni kü taküm nung Yisu melen kecha leman meshimtsü. Asenoki iba küm tepiyong lira, iba jaki tesünep teimla kuli asütsü.

AO OSHI ANGAZÜKDAK:

TANÜ ANGAZÜKTSÜBA OJANG



Tzürong

(n) ayong nung tzü tulu ayimdak ( torrential water in river)

\* Tzürong nung ango aputsü kanga tasak .

Tzürü

(adj) tzü menokdangteti tapok nungi yima aluba (minor groundwater source)

\* Tesem aika nung tzürü nungi ayong küma tzü ayimer.

OLONG PAITEP # 7419

15x15 crossword grid with numbers 1-17 indicating starting positions for words.

TIPLÉN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S \_\_\_ i - (3)
9. Nisung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Majinü - (5)
13. Tzuma nung senzüba - (5)

OLONG PAITEP # 7418 TELANGZÜBA

TIPLÉN :

- 1. Telok, 4. Aluru, 6. Ozüng,
8. Emk, 9. Kin, 10. Teti, 12. Süir,
13. Jen, 14. Ola, 16. Talak,
17. Mazük.

LANGTSÜNGLEN :

- 1. Tenükjang, 2. Luden, 3. Kiochtsü,
5. Lenti, 7. Tajangzük, 11. Teronem,
12. Sempa, 13. Jahaz.

NAI-A YA METETTER



February 16, 2026 nü China nung drones 22,580 amshiba ajanga Guinness World Record ka yangluogo. Anhui Province nung Spring Festival Gala nung "the most multicopter/drones airborne simultaneously from a single computer" otsü yanglutetogo.

Sorkari süngolu mapa inyakertem taa tutsütsü: Ajanta Neog

Guwahati, February 18, 2026 (Agencies): Assam sorkari tea garden workers taa tutsütsü atema tea associations den olemtepa arudar aser küm ka tsüngda lemtet ka agitsü akok ta Finance Minister Ajanta Neog-i ashi.

"Assam nungi tea exports ajak nung tesadang kaji orthodox tea kümdaktsütsü sorkari nükjidong yua lir. Tea industry azükaruba ajanga süngolu nung inyakertem ajangzükdaktsüsüla aser taa atutsü atema maneni jembidar" ta 2026-27 atema interim Budget benokdang Neog-i ashi.

Süngolu nung inyakertem indang minimum daily wage

reprangshibaji October 2023 nung Rs 18 atuba liasü. Idangji Brahmaputra Valley nung Rs 250 aser Barak Valley nung Rs 228 kümtsü ta laisa Assam Assembly nung ashi.

FY 2025-26 nung Assam-i orthodox tea 40 million kilograms tashi tangalen yoka liasü. Iba sector akangshitsü atema sorkari production subsidies seret nung Rs 10 nungi Rs 15 kümtsüogo ta Minister Neog-i metetdaktsü.

Assam Tea Industrial Special Incentives Scheme (ATIS) kübok tea gardens 1,914 nung orthodox tea production ajungkettsü atema

Rs 392 crore agütsüogo ta laisa shisem.

"Putu aika süngolu nung inyakertem "informal inhabitants" ta dang züngshia aru. Ajisüaka Assam Fixation of Ceiling on Land Holdings (Amendment) Act, 2025 agizükba ajanga sorkari tea estates 800 tema nung kibong lakh 3.5 nem permanent land rights agütsütsü bilemer" ta Neog-isa ashi.

Taküm March ita Prime Minister Narendra Modi-i land pattas lema agütsütsü imlar. Iba ajanga süngolu nung inyakertemi PMAY-G kübok tajangzüktem angutsü ta laisa metetdaktsü.

ADG Major General Vij-i Manipur NCC unit akangshitsü

Imphal, February 18, 2026 (Agencies): Manipur nung NCC unit akangshitsü sentong lir ta Additional Director General (ADG), NCC Directorate North Eastern Region, Shillong, Anurag Vij-i ashi.

Major General Vij-i Manipur nung NCC unit semdangdang iba osang metetdaktsü.

Major General Vij-i Manipur nung NCC maparen meyipa reprangshi aser NCC officers, staff o cadets den ajurutepa sensaksem.

Idangji pai Manipur nung

NCC training modules, youth development initiatives, discipline standards aser tanga osangtem lemsatop.

Kümtem süia arudang NCC Manipur unit ajanga mapa tajung inyaka arur. New Delhi nung Republic Day Parade alidang North East Region nungi Assam sülen Manipur-i cadets teimba yoka liasü ta Major General Vij-isa ashi.

Ajisüaka, tawa Manipur tensa ajanga cadets shilem agiba nung tetsükdaktsü ajurur. Tensa tajungba küma aodang

Directorate-i akokba tashi unit akangshitsü asoshi merangtsü ta pai metetdaktsü.

Manipur nung NCC cadets teimba akümstü aser Directorate-isa tarutsü nung Manipur nung All India Adventure Camp ka ayongzüktsü nükjidong lir ta ADG-isa ashi.

Maneni, Manipur nung NCC polo team asentenshitsü merangtsü aser polo asayar lanurtem ajiteta NCC unit nung züngoktsü ta Major General Vij-isa ashi.

Amit Shah-i CRPF anniversary parade nung adentsü

Guwahati, February 18, 2026 (Agencies): Assam nung tang mezüng atema Central Reserve Police Force-i anniversary parade alitsü aser iba sentong nung Union Home Minister Amit Shah adentsü.

CRPF ceremonial parade nung contingents 8-i shilem agitsü aser contingent shia personnel 1,400 shi alitsü ta tanü Guwahati nung CRPF ketdangsürtemi osangbener dang ashi.

"CRPF-i northeast nung

mapang talangka sendaktepa aruba aser yimjung, tensa süngjema ayutsü aser internal security atema bendanga agüja inyakba iba sentong ajanga sayutsü" ta Additional Director General (ADG), North East Zone, Rajiv Srivastava-i ashi.

Brihostibarnü Director General's Parade alitsü aser idangji CRPF Director General GP Singh-i tongti tesemdang ama adentsü. Sentong anaprong ya Sarusajai Stadium, Guwahati nung dang agitsü ta Srivastava

Iba CRPF ya Deputy Commandant-level officer Kumar ketdangsüba nung agitsü ta paisa ashi.

DG's Parade nung Distinguished Service Medals 6 aser trophies 5 dena awards 26 tashi lema agütsütsü. Maneni, Director General ajanga medals 61 aser trophies 8 agütsütsü aser tesüiba küm ka tsüngda Naxal tem aliba FOBs nungi Best Forward Operating Base nem DG-i sempet balaka agütsütsü.



Manipur kübok Jiribam district nung National Highway-37 nung Tata truck gari ka nung süng 120 beams (fanta) miima bener aliba apuba sülen agiba noksa angur. Osang tejanga ka angazükba sülen Special Mobile Patrol Unit, Jiribam aser Quick Reaction Team (QRT) 156 CRPF telok kati Leingangpokpi village nung mita atadang gari apu. Iba gari driver Jaipur, Rajasthan nungi Prem Chand (53) aser Rajasthan nungisa truck kibur Narayan Lal Bajya (42) na police-i pua lir.

GOVERNMENT OF NAGALAND
DIRECTORATE OF HEALTH & FAMILY WELFARE
NAGALAND : KOHIMA

NO.DHFW-21/FSSA/WP(MoU)/HR/53/2025-26/89

Dated:Kohima the18th Feb' 2026

NOTIFICATION

In pursuance to this Office Notification No.DHFW-21/FSSA/WP(MoU)/HR/53/2025-26/60-63 dated 6thFeb'2026, the Departmenton the basis of aggregate marks obtained in theInterview conducted for Food Technician (FSW) and Food Safety Officer on 10th& 11th of Feb'2026 at the Directorate of Health &Family Welfare, Kohima,is pleased to recommend the following candidates in order of merit for appointment to the contractual posts of Food Safety Officer and Food Technician (FSW) for a period of 2 months under the Nagaland Food Safety Project (MoU) 2025-26which is co-terminus.

Food Safety Officer Selected Candidates

Table with 3 columns: Merit, Name of the Candidate, Place of Posting. Row 1: Mr. Jongtosang Aier, CMO Office, Wokha, under FSSA Kohima Zone. Row 2: Ms. Yelika Yepthomi, CMO Office, Longleng, under FSSA Mokokchung Zone.

Waiting List (Validity period for waiting list will be for 1 month from the date of result declaration)
1. Ms. Khuvoitsonu Khatso 2. Ms. Nuvekholu Medeo

Food Technician (FSW)Selected Candidate

Table with 3 columns: Merit, Name of the Candidate, Place of Posting. Row 1: Ms. Medoneinu Solo, Under Designated Officer, CMO Office, Kohima Zone.

Waiting List (Validity period for waiting list will be for 1 month from the date of result declaration)
1. Ms. Keneisenuo Sekhose 2. Ms. Neikehenuo

Note \* Acceptance letter should be submitted to the undersigned within 7 days from the date of result declaration, delay in submission of the acceptance letter shall not be entertained.

(DR. MERENINLA SENLEM)
Principal Director & Addl. Food Safety Commissioner
Directorate of Health & Family Welfare
Nagaland : Kohima

Office of the
MONGSENYIMTI KAKETSHIR TELONGJEM
B.P.O Mongsenyimti, P.O Chuchuyimlang- 798614
Mokokchung, Nagaland

KÜMREM PELA YIMYIM

Langpangkong Kaketshir Mungdang lenitsü asoshi Sb. Tzuwasanen Jamir (Mongsenyimti) dak mulung lemteta Langpangkong sanger inti-i maong tulu agüja Langpangkong Kaketshir Mungdang Tir shimtet nung Mongsenyimti Kaketshir Telongjem Mendenti ajanga shisatsü aser mulungsentsü rangpeni arokaroka pelaba sangdonger. Asen Langpangkong nungertemi asen tükongsanger tebhonglang ayak nung azüiter, ka küma longjemshir tejakleni tangatetba tasen nung asen Kaketshir wadang walokshia anidaksü penzü nung asen lenir aser ketdangsürtem maneni nungitsü ayongzüker.

Sb.Tzuwasanen Jamir-i anir 2026-2029 Langpangkong Kaketshir Mungdang wadang tongzüka bener aotsüpur ajak nem MKT ajanga tenüngsang tulu agütsür. Nenok mangdang aser nükla aketba mapatongtem ajanga asen Kaketshir aser Langpangkong sanger temelengshiba nung tejakleni anitsü sarasadema atar.

Sd/- Kr. Nongtetola Jamir
Sb. Tsungremketba Ozukum Tongti Zülur, MKT
Tir, MKT

Office of the
Mangkolemba Town Baptist Arogo
Mangkolemba : Nagaland

ADVERTISEMENT

Arogo Clerk post ka atema :
1. Tanaben asoba Khristan taküm ka asütsüla.
2. Graduate in any discipline den office mapa metetba asütsüla.
3. Computer literate den Ao oshi zülutetba/metetba asütsüla.
4. Tasoba küm 25 nungi 35 tashi asütsüla.
Application den nüngdakba kuli kaketem 28th February 2026 tashi nung submit asütsü metetdaksür.

Sd/-
Rev. Dr. Lepden N. Imchen
Pastor
Mangkolemba Town Baptist Arogo

Telemtetba makai Russia-Ukraine yimjung ken o jembiba temogo

Geneva, Tsüklai/February 18 (Agencies): Ukraine nung Moscow indang rara atemtsü nükjidong nung Russia, Ukraine aser US tsüngta jembishinü akaba nung telemtetba kecha makai tembangogo.

Geneva nung linük asem nungi lenirtem Mongulbarnü menua amen saka Bodhbarnü ghonda ana dang mena liasü.

US envoy Steve Witkoff-ibo jembishinü nung teimla akaba lemsatop, saka Russia aser Ukraine tsütsü nungi tasak liasü ta ashir.

Küm pezü raraba nung litsü- lika aser ceasefire onüktem nung Mosow aser Kyiv majurutepteter.

Jembishinü nung atsüanem akatsü tasak süaka Kremlin negotiator Vladimir Medinsky-i parnok ya "businesslike" ama liasü aser ano yakta senden ka amentsü ta ashi.

Ukraine Tir Volodymyr Zelenskyy-ia linük ana tangatetba balala asüba mechi jembishinü temela masü ta ashi.

Ukrainian negotiator Rustem Umerov-ibo tongtipang onüktem süoka jembiba aser terenlok lir saka tangbo jembishinü ajunga tejangja meshitetsü ta ashi.

"Ibai tepenja mapa lir, kong telok ajunga lirumedemtsü aser mapang teperi nüngdaker," ta Umerov-i ashi.

Jembishinü tembangba sangdongtsü mapang tatsüka lia, Russia-i 'final stage' tonger aliba jembishinü atsülangtsü meranger, ta Zelenskyy-i aitsü.

US tetsüngtai ia Russia aser Ukraine ketdangsürtem tesüsa Abu Dhabi nung January ita ajurutepa liasü, aser ibaji ajanga ita ishika tepuokdak alirtem memelentepi aliba melentepa liasü. Bodhbarnü Zelenskyy-i ano nisung kar melenteptsü ama ashi.

US Tir Donald Trump, shibai anir rara tembangdaksütsü meranger, pai linük ana tsüngta mangatetep aliba nung taremsük makateti akumba

jembiba arur. Hombarnüa Ukraine ya tekeraba nung langpangi aru tajungba ta pai shia liasü koba Zelenskyy-i magizüker aser atsüanem akatsü par linük dang kisüing ashiba ya tim masü ta ashir.

Russia-i Ukraine anüdoklen Donetsk aser Luhansk regions agi akumba Donbas agitsü meranga arur.

Iba tesem agütsüba ajanga Russia-i ano amaktsü melamela akumtsü südi ta Ukraine nunger aikati amanger.

Ano jembishinü nung mangatetep aliba onük kaji Zaporizhzhia Nuclear Power Plant indang lir.

Iba power plant ya Europe nung tulutiba lir aser March 2022 nungi Russia kübok lir. Ukraine-i iba ya meyipa aginer aser taoba mapang Zelenskyy-i iba plant ya America nunger den lemsatapa ketdang asütsü akok ta shia liasü, koba Moscow-i memulungtsü amai lir.

Bulgaria parliamentary election April 19 nü agitsü

Sofia, Tsüklai/February 18 (Agencies): Bulgaria nung parliamentary election April 19 nü agitsü ta tir Iliana Iotova-i metetdaksüogo.

Taoba sorkar December ita mapa nungi anenba sülen Bodhbarnü iba osang ya sangdongogo. Taoba küm nüburtemi ochi mashi inyakyim anema longkak aitba sülen sorkar loksa liasü.

Taoba hopta Iotova-i, caretaker sorkar achaayangtsü atema Bulgarian National Bank deputy governor Andrey Gyurov shim aser election agitsü atema renemtsü asoshi nonglokja liasü.

"April 19 nü election agitsü atema ni official tetuyuba ka agütsütsü," ta Iotova-i Bodhbarnü Gyurov den senden ka amenba sülen osangbenertem den

sensaksema mapang ashi. Iba senden nung Gyurov-i caretaker sorkar züngsemtem sangdonga liasü.

Bulgaria, shirnok January 1 nü eurozone nung denogo, iba linük ya mapang talangka yimden yimsüsüba dak sendakba nung mepetmsü ajangshia arudar. Linük nung party kati danga linük yimsü asütsü atema coalition takang ka meyangluteti arudar

Taruba parliamentary election ya linük nung küm pongu tsüngda election tibuba asütsü.

2024 küm tesüsabuba election agiba mapang conservative GERB party temaba jenjang nung liasü aser parnoki anir coalition sorkar ka tenteta liasü.

Ajisüaka 2026 draft budget anema nüburtemi November

tatemlen nungi longkak ait tenzü. Longkak aitertemi ashiba agi, iba budget ya ochi mashi inyakyimtem miimbangtsü atema lir.

Taoba ita Bulgaria tir mapang talangka inyaksang Rumén Radev, shibai sorkar anema jembiba aruogo aser longkak aitertem pusema liasü pai pa mapa toktsüba sangdongogo. Pa election nung tokteptsü akok ta bilema aliba mapang iba jenjang agiogo.

Arishi küm 62 tain Radev-i linük den jembiba mapang, pa European Union aser NATO züngsem atema tarutsü nung raratsü aliba nung pa shilem agitsü atema tejangraba aliba lemsatopogo.

Radev ya pa indang deputy, Iotova-i melena liasü. Tir tasenba atema election ya taküm küm tatemlen agitsü imlar.

Philippine VP Sara Duterte 2028 küm tir atema tokteptsü



Manila, Tsüklai/February 18 (Agencies): Philippine Vice President Sara Duterte-i, tebu aser taoba tir Rodrigo Duterte tsüngsü nung anidaka la 2028 küm election nung tir atema tokteptsü tebilemba aliba lemsatopogo. Duterte ya meimchir anema inyaksangshiba asoshi International Criminal Court (ICC) nung o bendangdar.

"Kü taküm ya ni atema dang masü ta angatetsü asoshi küm 47 agiogo," ta Sara Duterte-i Bodhbarnü ashi.

"Ni Sara Duterte aser ni Philippines tir atema tokteptsü," ta lai ashi.

Duterte-isa, taoba tir election nung tir Ferdinand Marcos Jr pusemba atema la sülen anidakertem dang tatok meshia liasü.

Philippines ya ochi mashi inyakyim nungi tenzüker sensaktia kanga buluba aser libalirotsü kanga tasak akümba tebilemstü agi kanga timtema arudar.

"Ni Filipino nunger ajak matsüngdang apudaka tatok

memeshitetsü. Ajisüaka ni kü taküm, kü tashi aser kü tarutsü linük tenzüksü asoshi bendanga agütsür," ta lai shisem.

Küm pongu tejangdang election mapang Marcos pusemaka Duterte aser tir na tsükchir kümogo. Duterte-i sorkar senotsü mashiyimi amshir ta shia 2024 küm bushisüngdang tenzüksüba sülen tena tesendaktep kanga mejungi kümogo.

Maneni taoba küm Marcos-i ICC tenüng nung la tebu aputsü atema Philippine National Police aser Interpol nem temelaba agütsüba sülen tena tesendaktep tamajungba kümshi.

Tatong tir aser lar kibong asoshi kanga dang timtem ajangshia aoba hopta ka nung lai la tir atema tokteptsüba osang ya sangdongogo. La ya ochi mashi inyakyim atema aitsüba aser tir Marcos tepsettsü amokmerenba atema House of Representatives nung impeachment atema tashishiba aika ajangshiba mapang ka lir.

# Feb 28 nü U-14 KIC football trials agitsü



**Chümoukedima, Tsüklai/February 18 (TYO):** Khelo India Centre (KIC) Chekiye Village aser Chekiye Village Sports Association na longjemer February 28 nü KIC Football Academy 2026-27 batch atema Under-14 tetsür aser tebur non-residential selection trial ka agitsü.

Trials ya Chekiye Local Ground nung anepdang 9.30 ako nungi tenzüka agitsü aser Chümoukedima district nungi temsüa aliba asayar ajak asoshi asütsü.

Lanur football asayartem bushiteta KIC academy nung

structured coaching ajanga parnok anitetsü nükjidong nung iba shimshiraba inyakyim ya benoka inyaker. Trail ajanga shimba asayartem academy nung züngoksemtsü aser Khelo India programme kübok anogoshia training agütsütsü.

Trails nung shilem agitsüpurtem dang selection agitsüba tesemi sobutsü shita sobur arutsü mepeshia metetdaksüogo.

District nungi lisopurtem dang iba trails nung shilem agitsü jaokogo.

Khelo India Centre tem ya district level nung grassroots

sports infrastructure tashi itshitsü, lanur asayartem anitetsü aser saisabong nung ajaki shilem agitsü atema ajungmesotsü nükjidong nung amenokogo.

Ano iba inyakyim ajanga taoba mapang asayartem mapa inyaksü asoshi maongka agütsütsü aser linük nung sustainable sporting ecosystem ka yangertsü meranger.

Osang tejangjaba agitsü atema tejangrartemi Coach Dolezo Hesü, KIC Chekiye den iba number; 7627942332 ajanga t o n g t e p r a t e p t s ü metetdaksüogo.

# T20 World Cup: South Africa-i group stage nung asaya ajak kokogo

**Tsüklai/February 18, 2026 (Agencies):** Bodhbarnü Delhi nung group stage nung tatembangbuba asaya nung United Arab Emirates wicket trok agi akokba sülen South Africa T20 World Cup Super 8s-i iogo.

Mezüng batting amenba sülen UAE-i run 123 yanglu, kong South Africa team-i ball 40 anunga lia ayong ayonga menepa liasü. Iba asaya nung SA asoshi amokmeren ajak agi tsüingsang dang liasü.

Taruba round-i aitsü asoshi jangjar asünung South Africa-i iba asaya atema asayar pezü melen aser David Miller, Marco Jansen, Keshav Maharaj aser Lungi Ngidi nunger anisüngzükdakja liasü.

UAE-i atema Aryansh Sharma (13) aser captain Muhammad Waseem (22) nati kanga kümdanga asaya tenzüik saka tenaprongla Corbin Bosch aser George Linde nati out sütsü. Alishan Sharafu-i team

jenjang yanglushitsü merang saka pa nem teyari agütsür maliasü aser asayartem kanga kara out süma.

Half century ajungtsü run pongu dang nüngdaka lia Sharafu out asüba sülen team jenjang kanga mejungi aküm aser parnoki over 20 nung asayar 6 out ser run 122 yanglua liasü.

South Africa pur batting amentsü lia tzünglu aruba ajanga asaya mapang tatsüka anena ata, saka asaya tenzüikba sülen captain Aiden Markram-i kanga kara ball 11 nung run 28 yanglua asaya kanga kara tenzütsü.

Ryan Rickelton aser Dewald Brevis nati maneni kanga junga asaya-a tenati run 30 aser 36 yanglu aser parnoki over 14buba nung asaya koka liasü.

UAE-i iba asayamung nung Canada dang akok aser kasa mapang nung South Africa-ibo Group D nung asaya pezüprongla kokogo.

# Manny Pacquiao aser Ruslan Provodnikov na April ita asayatsü



Manny Pacquiao

Ruslan Provodnikov

**Tsüklai/February 18, 2026 (Agencies):** Manny Pacquiao-i, pa April 18 nü taoba mapang junior welterweight world ?champion Ruslan ?Provodnikov den Las Vegas nung asayatsü ta shiogo.

Pa retire sür aliba nungi meyipa arua asayashi tenzüikba sülen tang agi tanabenbuba asayatsü lir. Arishi küm 47 tain asayar ya tatemsa July ita WBC welterweight champion Mario Barrios den asaya, koba draw nung tembanga liasü.

"Ni asayaba shia Philippines tenüng nung asayar. Ozü linük aser alima ajunga nung kü indang fan temi ni maneni ajungmesor," ta Pacquiao-i ashiba agi, iba asaya achayangertemi Bodhbarnü metetdakja liasü.

Iba asaya ya Thomas & Mack Center nung asayatsü, kong Las Vegas nung MGM Grand Garden Arena aser T-

Mobile Arena meyangu tsüngda 1990s nung tongtibang asaya aika ayongzüka asaya liasü.

Pacquiao ya 2021 küm asaya nungi anisüngzüngka liasü aser taoba küm nungi asayashi tenzüikogo. Pa ya 2016 nungi 2022 küm tashi Philippine Senate nung tenzüikogo aser 2022 küm tir election nung toktep saka tamakok angu.

Maneni division ti nung world champion asayar ya welterweight world champion tambusang aküm. Pai arishi küm 40 asüba mapang 2019 küm iba alizüng tongteta liasü. Pacquiao ya division ti nung world champion akümba mezüngbuba asayar lir.

Pai pa indang professional career nung asaya 73 nung asaya 62 akok, ti makok aser asem draw süa liasü.

Pa ya International Boxing Hall of Fame nung 2025 küm züngksemogo.

# T20I batter temrongnung Abhishek maneni temaba jenjang nung lir



**Tsüklai/February 18, 2026 (Agencies):** India opener Abhishek Sharma-i tawa junga masayatetaka pa ICC T20I batter rankings nung maneni temaba jenjang nung lir. Wicketkeeper-batter Ishan Kishan-a top 10-i iogo.

Abhishek tang asaya aliba T20 World Cup nung junga masayateti arudar. Pa USA den asaya nung golden duck ka achi aser iba sülen tepok mejungi akümba ajanga New Delhi nung mozükidangi aotsüsa aküm aser Namibia den masayatet. Pa meyipa arur Pakistan den asaya saka iba

asaya nunga duck achi.

Pa tawa junga masayateti aruaka maneni temaba jenjang nung lir. Kasa mapang nung Ishan jenjang 17 tejakdangi tua tang 11buba nung lir. Pai WC nung half century ana yangluba ajanga jenjang junga kümogo.

Australia den Kandy nung asayaba mapang century ka yangluba sülen Sri Lanka nunger asayar Pathum Nissanka-a jenjang asem tejakdangi tua tang T20I batters tem rongnung tasembuba jenjang nung lir.

Kasa mapang nung South Africa nunger asayar Ryan

Rickelton jenjang 22 tejakdangi tua tang 11buba nung lir aser Aiden Markram-a 15buba tongtetogo. USA batter Saiteja Mukkamalla jenjang 16 tejakdangi tua tang 21buba aser England nunger asayar Jacob Bethell-a jenjang 22 tejakdangi tua tang 32buba nung lir.

T20I all-rounder ranking nung Pakistan nunger asayar Saim Ayub temaba jenjang nung lir. Pai India den Colombo nung asayaba mapang wicket asem agiba sülen Zimbabwe captain Sikandar Raza ajatetogo.

Raza tanabuba jenjangi luogo aser Nepal nunger asayar Dipendra Singh Airee aser Afghanistan nunger Azmatullah Omarzai na tasembuba aser pezübuba nung lir.

Bowling rankings nung Afghanistan nunger spinner Rashid Khan tanabuba jenjangi tuogo aser pai temaba jenjang nung aliba India nunger bowler Varun Chakravarthy tera agi dang memenepe lir.

Zimbabwe pacer Brad Evans jenjang 10 tejakdangi tua tang pongububa nung lir. India nunger Axar Patel (14) aser Jasprit Bumrah (15) aser Ireland nunger spinner Matthew Humphreys (23) nungera jenjang junga kümogo.

## BILEMDANGANG

"Nü mapa tajungbo teti bilemtettsü."